



ADRIANO MKONDA

MAMBO YASIYO YA KAWAIDA

KUPITIA WATU WA KAWAIDA

Ishi Uwezo wako Halisi

MAMBO YASIYO YA KAWAIDA KUPITIA WATU WA KAWAIDA

Ishi Uwezo Wako Halisi

© 2022 by Adriano Mkonda

Simu: +255 656 189 370, +255 621 618 821

Barua pepe: mkondaadriano10@gmail.com

Haki zote zimehifadhiwa. Huruhusiwi kuiga, kunakiliki, kupiga chapa, kutafsiri au kutoa sehemu yoyote ya kitabu hiki kwa njia yoyote bila idhini ya mwandishi.

Kimeandaliwa na;

DIVINE TRANSFORMATION GLOBAL

Simu: +255 656 189 370

Barua pepe: ditraglobaltz@gmail.com

Facebook: Ditra Global Tanzania,

Instagram: ditra_global

WhatsApp link: <https://wa.me/message/WSSND7DQJGVC01>

Isipokuwa imeelekezwa, maandiko yote yamenukuliwa kutoka katika Maandiko Matakatifu ya Mungu yaitwayo Biblia yaani agano la kale na jipya, tolea la Swahili Union Version (SUV) © Bible Society of Tanzania 1997.

YALIYOMO

Nasaha Za Wasomaji.....	2
TABARUKU	4
SHUKRANI.....	5
UTANGULIZI.....	6
Ulimwengu Wa Ukawaida.....	9
Upande Wa Pili Wa Ukawaida.....	19
Ukawaida Hadi Mambo Yasiyo Ya Kawaida.....	29
Kwa Uwezo Wako Huo	38
HITIMISHO.....	43
MAREJEO	45
Vitabu Vingine	46

Nasaha Za Wasomaji

*Kupitia vitabu vinavyosambazwa na DITRA Global, nimeweza kujifunza vitu vingi ambavyo ni msingi kwa maisha yangu. Kupitia kitabu **Sayani ya muda**, nimegundua thamani kubwa iliyofichwa ndani ya muda. Hakuna awezaye kuusimamisha, kuuhifadhi au kuufidia muda, bali inawezekana tu kuukomboa kwa kutumia ipasavyo fursa zilizopo ndani yake. Vitabu vya huduma hii vimesheheni maarifa lukuki, kwa mtu yeyote mwenye shauku ya kuongezeka kimaarifa kamwe hatabaki alivyo. Mungu awabariki sana waasisi wa huduma hii.*

Beatrice Shupa
Dodoma Tanzania

Hatima ya kila mtu inapatikana katika maarifa, huduma ya DITRA Global imekuwa mwanga sana kwangu, kupitia vitabu vya kila mwezi na mafundisho katika vikundi vya WhatsApp nimeendelea kuongezeka zaidi kuielekea hatima yangu. Kila mtu anayetaka kuiona hatima bora ya maisha yake asome vitabu vya huduma hii na kufuatilia mafundisho yanayotolewa kwa njia ya mitandao ya kijamii.

Mwalimu Anord Amon Asingire
Karagwe, Kagera Tanzania

Kweli Mungu ana njia nyingi za kusema na watoto wake, Nimemwona Mungu akisema nami kupitia vitabu vya DITRA

*Global. Katika Kitabu cha **Sayansi ya muda**, nimejifunza kwamba kila muda una fursa zake, kuna muda wa kusoma, kuwa kazini, kuoja, kuolewa, kuwa navyo, kukosa n.k. Asubuhi, mchana, jioni na usiku vyote huja na fursa. Kuanzia sasa mimi nitakuwa mfuatiliaji mzuri wa fursa zinazokuja na muda. Mungu akubariki mwalimu Adriano Mkonda na azidi kukutumia zaidi.*

Tumain Ladislaus Kibona
Mbeya Tanzania

*Katika kitabu cha **Sayansi ya muda**, nimejifunza kitu kikubwa sana kuhusu kuukomboa wakati. Nimegundua kuwa hata Yesu aliukomboa wakati katika kazi aliyotumwa kuifanya hapa duniani, na ndiyo maana alikuwa na matokeo makubwa japo aliishi miaka 33 tu. Naam, kwa kuukomboa wakati kwake sisi tuliopaswa kuangamia katika dhambi leo tunaishi ndani ya ufalme wake, yeye ni mfano pekee katika somo hili. Hakika nimejifunza mengi. Mbarikiwe.*

Micklène Philipo
Dar es salaam Tanzania

TABARUKU

***Kitabu hiki ni maalumu kwa mtu yeyote
mwenye shauku ya kuuishi uwezo wake halisi
alioumbiwa na Mungu.***

**Kupitia kitabu hiki utazijua siri zitakazokusaidia
kuutumia na kuuishi uwezo wako halisi kwa
manufaa yako na ya ulimwengu wako.**

SHUKRANI

Ninamtukuza Mungu kwa kunipa neema ya kuandika kitabu hiki, ni matumaini yangu kwamba kupitia kitabu hiki mambo mengi yasiyo ya kawaida yatainuka ulimwenguni kote na kupitia hayo yeye [Mungu] atatukuzwa.

Kwa ujumla kazi hii ni matokeo ya uwekezaji wa watu wengi, ambao kama sitawatambua nitakuwa sijatenda haki kabisa. Watu hao ni;

Wazazi wangu wa kiroho Ask. Agnell Mguluka na mama Ask. Agness Mguluka ambao wameendelea kunitia moyo na kuniombea. Mungu awabariki mno.

Beatrice Shupa, Mwalimu Anord Amon Asingire, Tumain Ladislaus Kibona na Micklene Philipo kwa nasaha zao. Mungu awabariki kwa kukiongezea thamani kitabu hiki.

Deogratius Evord kwa kuandaa jalada la kitabu hiki, Mungu aendeleo kuikumbuka kazi ya mikono yako kwani umekuwa zaidi ya zawadi kwangu.

Mwisho, wewe msomaji, Mungu akubariki kwa kuchagua kusoma kitabu hiki. Naam, akupe sawa na shauku iliyokusukuma kusoma kitabu hiki.

UTANGULIZI

Je! Haya ni mambo ya kawaida?

Tafakari kuhusu meli chombo cha ajabu cha usafirishaji kinachoweza kusafiri majini pasipo kuzama kwa siku nyingi, huku kikiwa kimebeba maelfu kwa maelfu ya tani za mizigo. Je! Haya ni mambo ya kawaida?

Fikiri kuhusu ndege chombo kinachoweza kusafiri angani kwa siku nyingi pasipo muhimili wowote, tena kikiwa kimebeba mamia ya abiria. Je! Haya ni mambo ya kawaida?

Vipi kuhusu Treni, chombo cha usafiri ambacho hakishiriki barabara yake na chombo kingine chochote, tena kina uwezo wa kuongoza makumi ya mabehewa yakiwa na tani nyingi za mizigo. Haya nayo je! Ni mambo ya kawaida?

Je! Ulishawahi kuwaza namna unavyoweza kuwasiliana na mtu wa mahali popote ulimwenguni kwa njia ya kifaa cha kiganjani tu yaani simu? Tena kwa kifaa hicho kidogo unaweza kupata taarifa za ulimwengu wote kwa wakati wowote. Je! Haya nayo ni mambo ya kawaida?

Fikiri kuhusu Balbu (taa), kifaa kidogo ambacho kwa namna ya ajabu huzalisha mwanga na kwa mwanga wake giza hufanywa nuru. Haya nayo je! Ni mambo ya kawaida?

Viwanda vikubwa kwa vidogo vya uzalishaji, mitambo na mashine mbalimbali, majengo marefu na ya kupendeza kila mahali, na haya nayo ni mambo ya kawaida?

Ubunifu wa viwango vya juu kila mahali, maendeleo makubwa ya sayansi na seknojia, huduma (katika mwili wa Kristo) za viwango vya juu, mifumo mbalimbali ya kimaisha inayovutia na mambo mengi ya ulimwengu huu, je! Ni mambo ya kawaida haya?? Tafakari kwa upana.

Muda hauwezi kutosha, wala maneno kuisha, kuyataja mambo yasiyo ya kawaida ya ulimwengu huu. Ulimwengu umejawa na mambo mengi ambayo tukiyatafakari tutaishia kuchanganyikiwa, huku tukijiuliza maswali mengi yasiyo na majibu juu ya uwezo ulioamua uwepo wa mambo hayo.

Ukweli Rahisi...

Huu hapa ni ukweli rahisi kuhusu mambo yasiyo ya kawaida na ya kushangaza ya ulimwengu huu; mengi ya mambo hayo, hayajatokea mbinguni wala kuzimu bali yametengenezwa na kufanywa na wanadamu wa namna kama yako!

Utasema HAPANA, ni Mungu. Kumbuka, Mungu aliumba siku sita tu na kamwe hakuumba Meli, wala Ndege, wala Treni, wala Simu, wala Balbu n.k. Mungu aliweka UWEZO wa kuumba ndani ya wanadamu aliowaumba.

Ndani ya kila mwanadamu kuna uwezo kufanya mambo yasiyo ya kawaida yatakayoushangaza ulimwengu. Ajabu ni kwamba uwezo huo wa watu wengi umezikwa katika kaburi liitwalo UKAWAIDA.

Kitabu hiki kimekuja kwa mkakati maalumu wa kuufufua uwezo wa mtu yeyote uliozikwa katika kaburi hili. Ndani ya kitabu hiki utajifunza kanuni zitakazokusaidia kuuishi uwezo wako halisi uliouiambiwa na Mungu.

Kama kuna chembe yoyote ya uwezo wako imezikwa ndani ya kaburi la UKAWAIDA, hadi mwisho wa kitabu hiki itakuwa imeurejelea uhai wake. Naam, wewe utakuwa sababu ya kuzaliwa kwa mambo yasiyo ya kawaida ulimwenguni.

NIMEKUOMBEA

Adriano Mkonda

Agosti 2022

Ulimwengu Wa Ukawaida

“Ukawaida ni mkoa uliopakana na kutokujikubali upande wa kaskazini, kukosa maamuzi upande wa kusini, mawazo ya kale upande wa mashariki na ukosefu wa maono upande wa magharibi”
-John Mason

Je! Wajua kuwa kwa wastani mwanadamu hutumia 10% tu ya uwezo wa ubongo wake?

Katika dibaji ya kitabu “**How To Win Friends And Influence People** (Namna Ya Kushinda Marafiki Na Kushawishi Watu) cha **Dare Carnegie**, Mwandishi wa habari **Lowell Thomas** aliandika kuhusu ukweli huu.

Makundi mbalimbali pia ya wataalamu kutoka katika nyanja mbalimbali wameendelea kuthibitisha kwamba mwanadamu hutumia kiwango kidogo sana cha uwezo wake wa asili.

Hii ni kusema kwamba tunaishi katika ulimwengu wa watu wa kawaida sana kiuwezo, kiasi kwamba huhitaji kufunga na kuomba ili ukutane na watu hao. Kwa wastani karibu kila unayekutana naye ni mtu wa kawaida! Jaribu kutafakari.

Mambo mengi makubwa ya ulimwengu huu, kama tulivyopata picha katika utangulizi, yamefanywa na asilimia ndogo sana ya watu kuliko unavyoweza kufikiria.

Asilimia kubwa ya watu waliowahi kuishi, hatuwezi kuwakumbuka kwa lolote isipokuwa kwa alama za misalaba ya makaburi yao, naam, wengi wa walio hai hawatakuwa na utofauti wowote na hao waliotangulia. Ni hatari sana.

“Usisubiri tukukumbuke kwa alama ya kaburi lako, ishi uwezo wako halisi sasa”

Kama kwa wastani mwanadamu hutumia 10% ya uwezo wake wa asili, je! ulimwengu ungekuwa na mwonekano gani kama mwanadamu huyohuyo angetumia angalau 80% ya uwezo wake? Jaribu kufikiri.

Utagundua kuwa kuna mambo mengi ambayo ulimwengu ulipaswa kuyafaidi lakini yamefichwa ndani ya mamilioni ya watu ambao kwa kujua au kutokujua wamejitambulisha na ukawaida ambao umefyonza uhalisia wao wote na mwishowe umewafanya wawe wa kawaida kama jina lenyewe lilivyo. Ni wakati wa kuukataa ukawaida.

Ukawaida ni ugonjwa hatari sana unaoshambulia uwezo na hatima za mamilioni ya watu ulimwenguni kote, na kwa







kukosa ufahamu wa ugonjwa huu ndoto na hatima za wengi zimezikwa kabisa.

“Ni wakati wa kuukataa ukawaida”

Kupitia kitabu hiki utaelewa ukawaida katika uhalisia wake na zaidi sana utajifunza namna unavyoweza kutoka katika hali ya ukawaida na kuwa mtu anayefanya mambo yasiyo ya kawaida. Twende pamoja;

Usuli Wa Ukawaida

Kulingana na kamusi ya kiingereza ya Merriam Webster neno **“Ukawaida (average/ordinary)”** sawa na kifaransa (French) **“Mediocre”** ni neno lililotokana na neno la Kilatini **“Mediocris”** ambalo humaanisha;

-  Wastani
-  Ya kawaida
-  Ya ukubwa wa kati
-  Ya katikati
-  Mahali pa kawaida
-  Nusu

Neno ukawaida (mediocre) lilipata umaarufu katika karne ya 16, hasa lilipotumika na wapanda milima kumaanisha wapandaji walioishia katikati ya mlima (wasiofikia kileleni). Na kutokea hapo neno hili limekuwa likitumika karibu kila mahali duniani.

Watu Wa Kawaida

Ni mara nyingi tumelitumia neno “kawaida” kuwahusu watu, kwa mfano ni kawaida kusikia “wale ni watu wa kawaida”, “yule ni mwanafunzi wa wastani darasani”, “watu wa nchi hii ni wa uchumi wa kati”, n.k.

Swali la kujiuliza ni, Je! Ni picha gani tunakuwa nayo kichwani tunapoyatumia au kuyasikia maneno kama haya??

“Watu wa kawaida ni watu wasi ufikia uwezo wao halisi”

Katika uhalisia, tunamaanisha hawako katika hali mbaya wala hawako katika hali nzuri, hawajafaulu sana wala hawajafeli sana, wapo mahali pazuri kwa kifupi.

Moto Au Baridi Na Si Vuguvugu

Inasikika vizuri sana kwamba nipo mahali pazuri, naam, mamilioni ya watu wapo hapo na wanapenda kukaa hapo. Lakini wasichojua wengi ni kwamba hakuna eneo hatari kama eneo la ukawaida.

Hapa ni mahali ambapo wengi huishia kuridhika na matokeo yake maono yao, malengo yao, mawazo yao, na hatima zao huzikwa hapo. Hatupaswi kuridhika kuwa watu wa kawaida ni hatari kwa hatima zetu.

“Ni kosa kubwa kujihisi au kujiona wa kawaida, hukukusudiwa uwe mtu wa kawaida”

Hata Mungu anawachukia kiasi cha kuwatapika watu wa kawaida (vuguvugu), hii ni kwa sababu kamwe hakuumba watu wa kawaida wala hatarajii mtu yeyote kuwa wa kawaida (tutajifunza zaidi katika sura inayofuata). Biblia inasema;

Ufunuo wa Yohana 3:15-16 “Nayajua matendo yako, ya kuwa hu baridi wala hu moto; ingekuwa heri kama ungekuwa baridi au moto. Basi, kwa sababu una uvuguvugu, wala hu baridi wala hu moto, nitakutapika utoke katika kinywa changu.

“Chagua kuwa moto, usiridhike na ukawaida”

Vyanzo Vya Ukawaida

Chanzo #1: Kupoteza Mfano Na Sura Ya Mungu

Katika vyanzo vyote, hiki ndicho chazo kikuu cha ukawaida. Biblia inasema, tumeumbwa kwa mfano na sura ya Mungu (**Mwanzo 1:26**).

Hii inamaanisha kwamba utendaji wetu unapaswa kuakisi utendaji wa Mungu, Mungu ni mwenye uwezo wote, tena ni yeye aliyetupa uwezo wa kufanya makuu. Hivyo tunapaswa kuudhihirisha uwezo wetu wote.

**“Tunaanza kuwa wa kawaida pale tu
tunapopoteza mfano na sura ya
Mungu”**

Kwa njia ya dhambi tunaweza kupoteza mfano na sura ya Mungu na kwa hiyo tunakuwa watu wa kawaida kabisa kinyume na vile Mungu alitarajia tuwe.

Adamu mwanadamu wa kwanza alipomtenda Mungu dhambi, yeye na wanadamu wote waliofuata baada yake walijiingiza katika ukawaida mpaka alipokuja Adamu wa Pili yaani Yesu. Urejelee leo uhalisia wako kwa kumpa Yesu maisha yako, nawe hutakuwa mtu wa kawaida.

Chanzo #2: Ujinga (Ukosefu Wa Maarifa)

Watu wengi wanaishi katika ukawaida si kwa sababu walikusudiwa wawe wa kawaida lakini ni kwa sababu wamekosa maarifa sahihi kuhusu wao.

Hapa tunamaanisha maarifa ya wao ni akina nani, walitoka wapi, wapo hapa kwa kusudi gani, na wana uwezo gani. Hili ni tatizo la watu wengi na matokeo yake wengi wameishia kuwa watu wa kawaida.

“Kama utakosa maarifa sahihi kuhusu wewe, ni dhahiri kwamba utaishia kutenda chini ya uwezo wako halisi”

Ni wakati wako wa kujitambua. Tafuta maarifa sahihi yatakayokusaidia kujua wewe ni nani, uliumbwa kufanya nini na namna gani unapaswa kufanya. Huo utakuwa ufunguo wa wewe kuufikia uwezo wako halisi. Mungu akusaidie.

Chanzo #3: Asili (Tamaduni)

Kila mtu huzaliwa katika tamaduni au asili fulani, na kila utamaduni una namna unavyoyatafsiri maisha, pia una miongozo yake ya namna watu wa tamaduni husika wanavyopaswa kuishi.

Tamaduni nyingi zimekuwa sababu ya watu kuishia katika ukawaida. Kwa mfano, kuna tamaduni zinaamini kuna aina fulani tu ya watu wanaweza kuwa viongozi na wengine watawafuata hao.

Kwa tamaduni hizi uwezo wa kuongoza wa watu wote wasio na vigezo vya kiuongozi vya tamaduni husika utazikwa na watu hao wataishia kuwa watu wa kawaida tu yaani wafuasi (followers).

“Huwezi kutoka katika ukawaida kama unaendelea kuishi chini ya tamaduni zinazogandamiza uwezo wako”

Zipo tamaduni nyingi amabazo zimeendelea kuzika hatima za watu wengi. Mungu wa mbinguni akupe neema ya kwenda zaidi ya tamaduni zinazokuzuia kuufikia uwezo wako halisi.

Chanzo #4: Mifumo Mbalimbali Ya Ulimwengu Huu

Ulimwengu una mifumo mingi, na baadhi ya mifumo hiyo imekuwa makaburi ya ndoto na hatima za watu wengi.

Kwa mfano, mifumo ya elimu ya karibu kila mahali ulimwenguni haimfundishi mwanafunzi kuuendeleza uwezo wake halisi bali kwenda sawasawa na mifumo husika. Matokeo yake elimu ambayo hudhaniwa kuwa ni ufunguo wa maisha imekuwa gereza la maisha ya wengi.

“Ni wakati wako wa kwenda zaidi ya mifumo ya ulimwengu huu”

Mifumo ya kiimani pia imekuwa vyanzo vya wengi kuishia katika ukawaida. Kuna imani nyingi katika ulimwengu huu lakini si zote zinamsaidia mtu kuufanania mfano na sura ya Mungu aliye chanzo cha uwezo wote.

Chanzo #5: Kuiga (Kujifananisha Na Wengine)

Kama tulivyojifunza awali, kwa asili mwanadamu aliumbwa kwa mfano na sura ya Mungu, yaani aliumbwa amfananie Mungu. Kama Mwanadamu huyu atakosa ufahamu huu au atapoteza hali ya kumfanania Mungu, ataanza kutaka kufafanana na watu wengine au na vitu. Naam, huu ni ugonjwa mkubwa katika historia ya ulimwengu, ugonjwa wa kutaka kuwa kama watu wengine.

Tunataka kuongea kama watu wengine, kutembea kama watu wengine, kuvaa kama watu wengine, kutenda kama watu wengine, kwa ujumla kuishi kama watu wengine. Matokeo yake tunaishia kuwa kama watu wengine yaani watu wa kawaida. Hii ni hatari. Kumbuka;

“Ukianza kuhisi au kujiona unapaswa kuwa kama mtu fulani, ujue bado hujajua wewe ni nani”

John Mason, katika kitabu chake kiitwacho *Imitation is limitation* (Kuiga ni kujizuia) anasema “Kitu rahisi kuwa katika ulimwengu huu ni kuwa wewe. Kitu kigumu zaidi kuwa ni kuwa vile watu wengine wanataka uwe.”

Kama unataka kuwa mbali na ukawaida basi chagua kitu rahisi zaidi **“Kuwa Wewe”**, usiruhusu mtego wa kuwa sawa

na watu wengine ukunase. Swali muhimu unalopaswa kujiuliza kila siku ni:

“Kama sitakuwa mimi halisi, nitakuwa nani??”

Hukukusudiwa Uwe Mtu Wa Kawaida

Kama tulivyojifunza katika kitabu hiki, ulimwengu umesheheni watu wengi wa kawaida, lakini si lazima uwe miongoni mwao, unaweza kuwa tofauti na wao.

Katika sura zinazofuata utajifunza ni kwa namna gani unaweza kujitofautisha na mamilioni ya watu wa kawaida wa ulimwangu huu.

Kama hiyo ni shauku yako basi ungana nami katika safari hii, name nitaendelea kukuombea kwamba hadi kufikia nukta ya mwisho ya kitabu hiki wewe hutakuwa mtu wa kawaida tena.

Kama unaamini sema AMINA, na tuendelee pamoja.

Upande Wa Pili Wa Ukawaida

**“Tena Mungu alivichagua vitu vinyonge vya dunia na vilivyodharauliwa, naam, vitu ambavyo haviko, ili avibatilishe vile vilivyoko”
-1Wakorintho 1:28**

Nyuma ya kitu chochote cha kawaida kuna kitu kisicho cha kawaida. Nyuma ya mtu yeyote wa kawaida kuna mtu asiye wa kawaida. Nyuma ya mtu yeyote asiyefaa kuna mtu anayefaa. Nyuma ya mtu yeyote anayedharaulika kuna mtu asiyeipaswa kudharaulika n.k.

Yanahitajika tu maarifa yatakayotusaidia kuona mambo yasiyo ya kawaida yaliyofichwa nyuma ya vitu au watu wa kawaida. Naam, sura hii ipo kukupa maarifa hayo.

Kutazama Katika Jicho La Ki-Ungu

Mungu anavyoutazama uumbaji wake ni tofauti na vile wanadamu wanavyotazama na kutafsiri. Vile vinavyoonekana vya kawaida, visivyofaa na vya kudhaurika kwa wanadamu sivyo vilivyo machoni pa Mungu. Biblia inasema;

Isaya 55:8 “Maana mawazo (mtazamo) yangu si mawazo yenu, wala njia (utendaji) zenu si njia zangu asema BWANA.” (misisitizo imeongezwa)

Katika sura hii tutajifunza mitazamo kadhaa ya vile Mungu anavyowatazama watu aliowaumba, na baada ya hapo tutaona mifano michache ya watu waliotafsirika kama watu wa kawaida kwa walimwengu lakini Mungu akawatumia kufanya mambo yasiyo ya kawaida. Bila shaka maarifa haya yatabadilisha mtazamo wako.

“Tunaweza kuyaona mambo yasiyo ya kawaida yaliyofichwa ndani yetu kama tu tutajitazama katika jicho la Kiungu”

Mtazamo #1: Mungu Huwatazama Wanadamu Kama Sura Yake Mwenyewe

Kumbuka wewe ni sura ya Mungu, uliumbwa hivyo **(Mwanzo 1:26-27)**, Mungu anapokutazama wewe anajiona yeye mwenyewe. Je! Walijua hili?

Kama wewe ni sura ya Mungu basi ujue unawajibu wa kujionyesha kuwa unamfanania Mungu katika mawazo yako, mwenendo wako na matendo yako.

Haijalishi watu wanakutazamaje, tambua kuwa wewe si mtu wa kawaida, wewe ni sura ya Mungu. Haijalishi ulizaliwa

katika mazingira ya ajabu kiasi gani, au ulikulia katika mazingira yasiyofaa, habari njema ni kwamba wewe umebeba vinasaba vya Mungu.

“Wewe si mtu wa kawaida, wewe ni sura ya Mungu”

Mungu anatarajia mambo makubwa kupitia wewe, mambo ambayo ukiyatenda watu watathibitisha kuwa wewe ni sura ya Mungu. Ondoka na mtazamo huu na Mungu akusaidie.

Mtazamo #2: Mungu Huwatazama Wanadamu Kama Viumbe Wenye Uwezo Usio Wa Kawaida

Ni ulimwengu tu na mifumo yake unaojaribu kuushusha uwezo wa mwanadamu, lakini katika uhalisia mwanadamu ni kiumbe aliyeumbwa akiwa mwenye uwezo usio wa kawaida. Tunaweza kujifunza ukweli huu katika kisa cha Gideoni;

Waamuzi 6:14 “Bwana akamtazama akasema, Enenda kwa uwezo wako huu, ukawaokoe Israeli na mkono wa Wamidiani. Je! Si mimi niliyekutuma?”

Kama Gideoni, Mungu anapokutazama anaona uwezo mkubwa ndani yako, anaona mambo yasiyo ya kawaida yanayoweza kufanyika ulimwenguni kupitia wewe. Hii ni

kwa sababu ni yeye aliyekuleta (aliyekutuma) duniani kulitimiza kusudi lake.

“Mungu hawezi kukuita katika kusudi pasipo kukupa uwezo wa kulitimiza”

Myles Munroe

Pengine ukijitazama unahisi una mapungufu mengi, au jamii inayokuzunguka inaamini hakuna jambo lolote la maana linaweza kufanywa na wewe.

Hiyo yote ni mitazamo isiyo sahihi kuhusu wewe. Ndani yako kuna uwezo usio wa kawaida kwa ajili ya kukamilisha kusudi kubwa la Mungu, ni wewe tu kuchagua kuuishi uwezo huo.

Mtazamo #3: Mungu Huwatazama Wanadamu Kama Waendeleza Uumbaji Wake

Kama tulivyogusia katika utangulizi, Mungu aliumba siku sita tu, tena aliumba vitu vichache (natural creation) kuliko vile vilivyopo leo (Artificial creation). Swali ni je! Vitu vingine viliumbwa na nani?

Katika kitabu chake cha “Ideas Rule The World” (Mawazo Huutawala Ulimwengu) mwandishi Sam Adeyemi anasema; “Mungu hakuumaliza uumbaji, alianza tu. Alimpa mwanadamu fursa ya kumsaidia kuumba kupitia mawazo yake. Angeweza kuumba kila kitu tulichonacho

leo, lakini hakufanya hivyo kwa sababu alitaka kushirikiana na mwanadamu.”

“Ndani yako umo uwezo wa kuumba mambo mapya ambayo hayajawahi kuwepo tangu dunia ilipoumbwa”

Mambo yasiyo ya kawaida ya ulimwengu huu ni matunda ya mawazo ambayo Mungu aliyaweka ndani ya watu aliowaumba. Je! Si fahari Mungu kuchagua kushirikina nasi katika uumbaji wake?

Umekusudiwa kufanya Mambo Yasiyo Ya Kawaida

Je! Ni mwanadamu gani anaweza kufananishwa na Yesu? Hakika hakuna popote duniani. Yesu alikuwa mwanadamu 100% na Mungu 100%, na alifanya mambo makubwa ambayo yanaendelea kuushangaza ulimwengu kila iitwapo leo.

Ajabu ni kwamba Yesu huyohuyo, mtenda maajabu, katika kuishi kwake hapa duniani alituahidi kufanya mambo makubwa kuliko hata yale ambayo yeye mwenyewe aliyafanya. Biblia inasema;

Yohana 14:12 “Amin, amin, nawaambieni, Yeye aniaminiye mimi, kazi nizifanyazo mimi, yeye naye atazifanya; naam, na kubwa kuliko hizo atafanya, kwa kuwa mimi naenda kwa baba.”

Wewe si mtu wa kawaida hata mbingu zinalijua hilo, na zaidi sana ulimwengu unakutegemea sana ili uwe na mwonekano bora zaidi kutokana na mambo yasiyo ya kawaida yaliyofichwa ndani yako. USIJIDHARAU.

Baadhi Ya Mifano Katika Biblia

Ipo mifano mingi ya watu ambao ulimwengu uliwatafsiri kama watu wa kawaida, lakini Mungu aliwatumia kufanya mambo yasiyo ya kawaida. Hatuwezi kuwataja wote lakini tutajifunza kwa wachache kutoka katika Biblia kama ifuatavyo;

Mfano #1: Gideoni

Kitabu cha Waamuzi 6-8, kinaeleza habari za Gideoni, mtu aliyeishi katika jamii ya watu waliokuwa wamekata tamaa **(Waamuzi 6:13)**, tena yeye mwenyewe alikuwa mtu dhaifu na mwenye hofu.

**“Watu wa kawaida wakikutana na
Mungu huishia kuwa mashujaa”**

Malaika wa Bwana alipomtokea alimthibitisha kuwa yeye hakuwa mtu dhaifu (wa kawaida) bali shujaa na kutoka hapo Gideoni alikuwa mwamuzi wa Israeli kwa muda wa miaka 40, na alifanya mambo makuu na ya kushangaza.

Mfano #2: Debora

Maarufu kama “**mama wa Israeli**”, kitabu cha **Waamuzi 4-5** kinaeleza habari zake. Katika utamaduni wa taifa la Israeli wanawake hawakupewa kipaumbele kama wanaume hasa katika masuala ya uongozi. Kwa namna ya ajabu katika kisa hiki tunaona Debora anapewa kipaumbele na Mungu.

“Watu wa kawaida wakipokea
utambulisho wao kutoka kwa Mungu,
mara zote huishia kuzishangaza
tamaduni zao”

Wataalamu wengine wa Biblia wanasema Debora alikuwa mama wa kawaida wa nyumbani, lakini Bwana akamwinua ili awe mwamuzi wa Israeli tena aliweka roho ya unabii ndani yake. Debora anasema;

Waamuzi 5:7 “Watawala walikoma katika Israeli, walikoma, Hadi mimi Debora nilipoinuka, Nilipoinuka mimi, mama katika Israeli.”

Ukisoma kwa makini sura hizo utaona mambo yasiyo ya kawaida ambayo Mungu aliyatenda katika Israeli kwa mkono wa Debora. Naam, kwa sababu ya mambo yasiyo ya kawaida aliyoyatenda, jina Debora ni jina maarufu sana katika historia ya Biblia.

Mfano #3: Yeftha

Katika Kitabu cha Waamuzi sura 11, ndipo zinapatikana habari za Yeftha. Yeftha alizaliwa kwa mwanamke kahaba hali iliyopelekea ndugu zake wamkatae naye akawakimbia na kuishi mbali nao **(Waamuzi 11:1-3)**.

Licha ya namna yake ya kuzaliwa na kukataliwa na ndugu zake, Biblia inamtaja Yeftha kama “mtu shujaa sana” tena aliyekuwa na Roho ya Mungu.

“Haijalishi historia yako ya nyuma
inasomeka vipi, wewe si mtu wa
kawaida machoni pa Mungu”

Israeli walipokuwa katika vita hakukuwa na msaada wowote ndipo wazee wa mji wakamtafuta Yeftha ili awasaidie, naam, kwa mkono wa Yeftha mwana wa kahaba (mtu aliyedharauliwa) Mungu alifanya mambo yasiyo ya kawaida.

Mfano #4: Esta

Huyu ni mwanamke maarufu sana katika Biblia na habari zake zinapatikana katika kitabu kilichoitwa kwa jina lake, kitabu cha Esta.

Esta alikuwa binti yatima (asiye na baba wala mama) aliyelelewa katika mazingira ya kitumwa na Mordekai **(Esta**

2:5-17). Je! Kwa mazingira haya, ungeweza kutarajia Esta angekuwa Malkia (mke wa mfalme)?

Kwa macho ya kibinadamu hili ni jambo ambalo haliwezekani, lakini si kwa Mungu. Kwa namna ya ajabu Esta, binti yatima tena mtoto anayelelewa na mtumwa akainuliwa na Mungu na kuwa malkia.

Kupitia Esta watu ambao hatima yao ilikuwa kifo waliokolewa, naam, kwa mkono wake waliokuwa watumwa wakaishia kuwa na amani. Hakika haya ni mambo yasiyo ya kawaida kupitia watu wa kawaida.

Mfano #5: Daudi

Daudi, mtu muhimu katika historia ya Biblia, aliyetenda makuu katika taifa la Israeli. Huyu ni mfalme anayesifika kuliko wafalme wote wa taifa hilo, naam, mtu aliyeupendeza moyo wa Mungu (**Matendo 13:22**).

Licha ya sifa zote za Daudi, Je! Waijua asili ya Daudi? Daudi, alikuwa mtoto wa mwisho wa mzee Yese (kati ya 8), mtu ambaye muda mwingi alikaa porini akichunga wanyama. Mtu ambaye hata familia yake haikumhesabu kuwa ni mtu muhimu (1Samweli 16).

“[Mungu] Humwinua mnyonge kutoka mavumbini, Na kumpandisha maskini kutoka jaani (Zabur 113:7)”

Kwa namna isiyoelezeka Mungu aonaye mambo yasiyo ya kawaida ndani ya watu wa kawaida alimwinua Daudi kuwa mfalme wa Israeli. Naam, hata Yesu (Mungu mwana) alijitambulisha kwa jina la Daudi (Yesu Mwana na wa Daudi). Jaribu kutafakari.

Hata Wewe Si Mtu Wa Kawaida...

Ipo mifano mingi ya watu wa kawaida ambao Mungu aliwatumia kufanya mambo yasiyo ya kawaida. Musa mtu asiyejua kusema vizuri, Rahabu mwanamke kahaba, Sauli (Paulo) muuaji. Mariamu mama yake Yesu binti wa kawaida tu, Wanafunzi wa Yesu watu wasio na elimu walioishia kuwa wapindua ulimwengu na wengine wengi.

Mifano hii imeandikwa kukuonyesha kuwa katika hali hiyohiyo uliyonayo Mungu anakutarajia kuwa miongoni mwa watu watakaofanya mambo yasiyo ya kawaida. **Wewe si mtu wa kawaida, jitambue.**

Sasa unaweza kujiuliza ni kwa namna gani mambo yasiyo ya kawaida yatazaliwa kwangu?? Ni rahisi, sura inayofuata ina majibu ya kina kwa swali hili.

Usiishie hapa, tuendelee pamoja....

Ukawaida Hadi Mambo Yasiyo Ya Kawaida

“Unapaswa kujifunza kanuni za mchezo. Na baada ya kujifunza ucheze vizuri kuliko mtu mwingine yeyote.”
- Albert Einstein

Kwa umbali huu wa kujifunza ni dhahiri kwamba sasa kumejua kuwa watu ambao ulimwengu huwaona **Wakuu** kwa sababu ya mambo yasiyo ya kawaida wanayoyafanya ni watu ambao kwa asili hawana utofauti wowote na wewe.

Wagunduzi wakubwa wa ulimwengu huu kama Thomas Edison, Henry Ford, Steve Jobs, Wright Brothers, na wengineo ni watu ambao leo wangesimama pamoja nawe ungeundua kuwa kwa asili wanafafa kabisa na wewe.

Viongozi maarufu kama Mwalimu Julius Nyerere, Nelson Mandela, Abraham Lincoln, Mama Teresa, Martin Luther Jr, Mahtma Gandhi, Margaret Thatcher na wengineo, hawakuwa na uwezo wa ajabu kukushinda wewe, ni watu kama wewe.

Matajiri wa ulimwengu huu kama Bill Gates, Jeff Bezos, Warren Buffet, Elon Musk, Mark Zuckerberg, Aliko Dangote,

Mohammed Dewji na wengineo, ni watu ambao waliumbwa na Mungu aliyekuumba wewe, yaani hawana utofauti wowote na wewe.

Kuna Siri Ipi Nyuma...?

Swali ni je! Kuna siri ipi nyuma ya mambo yasiyo ya kawaida yaliyofanywa na watu hawa na wengine wengi ambao wana asili moja na wewe?

Kunaweza kukawa na majibu mengi kwa swali hili lakini jibu sahihi ni kwamba watu wakuu ni watu wa kawaida wanaofanya **zaidi** ya kawaida. Ni watu wanaoenda umbali ambao watu wengine hawakuthubutu kwenda na matokeo yake huishia kufanya mambo yasiyo ya kawaida.

“Watu wakuu ni watu wa kawaida wanaofanya zaidi ya kawaida.”

Ukichunguza katika mifano ya watu tuliojifunza katika sura iliyopita na mifano hapo juu utagundua kuwa zipo funguo au siri ambazo watu hawa walizijua na wakaziishi, naam, kwa siri hizo wakawa wakuu.

Katika sura hii tutajifunza funguo 8 ambazo mtu yeyote, wa mahali popote na hali yoyote akizitumia atakuwa miongoni mwa watu wakuu wa ulimwengu huu.

Hapa hatumaanishi kwamba utakuwa kama watu tuliowataja, HAPANA, bali tunamaanisha utaufikia uwezo wako halisi ulioumbiwa na Mungu na kwa huo mambo makuu ambayo Mungu alikusudia uyadhihirishe ulimwenguni yatathibitika.

Funguo 8 Za Kwenda Zaidi Ya Kawaida

Kinacholeta utofauti kati ya neno **“Kawaida (Ordinary)”** na **“Zaidi ya kawaida (Extraordinary)”** ni neno **“Zaidi (Extra)-iliyovuka kiwango”**. Funguo utakazojifunza ni za kawaida kuzisikia, lakini zitaleta matokeo yasiyo ya kawaida kama zitaenda na neno “zaidi” katika matendo.

Ufunguo #1: Badiliko Zaidi

Kutoka kwenye ukawaida kunaanza na badiliko la mtazamo. Hivyo ulivyo ni matokeo ya mtazamo wako. Unaweza kuwa tofauti na hivyo kama tu utabadili mtazamo wako.

“Watu wakuu ni watu ambao mara zote wanajiona wao si watu wa kawaida.”

Inawezekana vyanzo vya ukawaida (sura ya kwanza) vimewekeza mtazamo wa ukawaida ndani yako kwa muda mrefu. Sasa ni wakati wako wa kuwa na mtazamo mpya, **“wewe si mtu wa kawaida”**, tembea na mtazamo huu.

Ufunguo #2: Kujitambua Zaidi

Ili uwe miongoni mwa watu wanaofanya mambo yasiyo ya kawaida unahitaji maarifa zaidi kuhusu wewe. Unahitaji kujua wewe ni nani na ulikuja duniani kwa kusudi gani.

“Watu wakuu ni watu wanaojua wao ni akina nani na walikuja duniani kwa kusudi gani”

Hukuumbwa kufanya kila kitu duniani, ulikuja kwa kusudi maalumu. Wekeza kujua kusudi lako, kwa kumwomba Mungu (mwanzilishi wa kusudi), kusoma vitabu (Pata nakala ya vitabu vyangu, “Kusudi 101”, “Maono 101”, “Malengo 101” na “Mafanikio halisi”) vitakusaidia.

Kumbuka, mambo yasiyo ya kawaida uliyoubwa kuyafanya yamefichwa kwenye kusudi lililomsukuma Mungu akuumbe. Jitambue.

Ufunguo #3: Fikiri Zaidi (Think Big)

Huwezi kuwa tofauti na vile unavyowaza (unavyofikiri), vile ulivyo leo ni matokeo ya vile unavyowaza kila siku, unaweza kuwa tofauti na hivyo ulivyo kama tu utabadilisha namna unavyowaza.

“Maana aonavyo [mtu] nafsini mwake, ndivyo alivyo.” Mithali 23:7a

Je! Unawaza nini? Mawazo yako ni ya namna gani? Wataalamu wanasema kwa siku mwanadamu huwaza mawazo 6000. Je! Wewe huwa unawaza mawazo gani?

**“Watu wakuu ni watu ambao wakati
wote huwaza mambo yasiyo ya
kawaida”**

Fikiri mambo makubwa (maono makubwa) unayoweza kuyafanya wakati wa uhai wako, acha kuwaza mambo madogo madogo wewe si wa viwango hivyo. Naam, Mungu akusaidie, nimekuomba.

Ufunguo #4: Maamuzi Zaidi

Ukweli ni kwamba hivyo ulivyo ni matokeo ya maamuzi yako ya kila siku, unaweza kuwa tofauti na hivyo ulivyo kama utaamua kwa utofauti.

Unapaswa kufanya maamuzi (wakati mwingine magumu) kwamba hutakuwa mtu wa kawaida, kwamba utauishi uwezo wako wote, naam, kwamba dunia itafaidi kila kitu chema ambacho Mungu alikuumba ukifanye.

Watu wote waliwahi kufanya na wanaoendelea kufanya mambo yasiyo ya kawaida ni watu ambao siku moja walikaa chini na kuamua kwamba wao hawatakuwa watu wa kawaida. Leo ni siku yako ya kuamua zaidi, kwenda viwango vingine na Mungu akusaidie.

Ufunguo #5: Nguvu Zaidi

Kama tunataka ulimwengu ufaidi mambo makubwa yaliyofichwa ndani yetu basi ni dhahiri kwamba tunahitaji kuwa na nguvu isiyo ya kawaida.

**“Watu wakuu hufanya mambo yasiyo
ya kawaida kwa nguvu isiyo ya
kawaida”**

Na nguvu tunayoizungumzia hapa ni nguvu ya Mungu, tuipatayo kutoka kwa Roho Mtakatifu. Biblia inasema;

Matendo ya mitume 1:8 “Lakini mtapokea nguvu, akiisha kuwajilia juu yenu Roho Mtakatifu; nanyi mtakuwa mashahidi wangu katika Yerusalemu, na kote katika Yudea, na Samaria, na hata mwisho wa nchi.”

Roho Mtakatifu ndiye chanzo kikuu cha nguvu ya kufanya mambo yasiyo ya kawaida. Watu wote tunaojifunza katika Biblia kwamba walifanya mambo makuu walikuwa na nguvu za Roho Mtakatifu.

Ufunguo #6: Bidii Zaidi

Haitoshi tu kuwa na nguvu zaidi, unahitaji bidii zaidi. Bidii ni uwezo wa kufanya zaidi ya kawaida, ni uwezo wa kuuwajibisha uwezo ulionao.

Hata kama una uwezo mkubwa kiasi gani kama uwezo huo hautachangamana na bidii wewe utaendelea kuwa mtu wa kawaida tena wa kawaida sana.

“Watu wakuu ni watu wanaofanya zaidi ya kawaida, wanaofanya kwa bidii.”

Maandiko yanasema;

Mithali 22:29 “Je! Wamwona mtu mwenye bidii katika kazi zake? Huyo atasimama mbele ya wafalme (hatakuwa wa kawaida); Hatasimama mbele ya watu wasio na cheo.” (Msisitizo umeongezwa)

Umekusudiwa kuwa miongoni mwa wakuu, kusudi hili litatimia kwako kama tu utachagua kuishi maisha yanayoambatana na bidii katika kila ulitendalo.

Ufunguo #7: Muda Zaidi

Kumekuwa na utamaduni wa kuamini kuwa mafanikio huja kama tukio tu la muda mfupi, huu siyo ukweli. Ukweli ni kwamba mafanikio ni mchakato unaohitaji muda.

Kama unataka kufanya mambo yasiyo ya kawaida katika dunia hii lazima ujipe muda, hapa ni pamoja na uvumilivu na kuendelea kusonga mbele pasipo kukata tamaa.

J.K. Rowling aliandika kitabu kiitwacho “Harry Potter”, kitabu kilichokataliwa mara 12 na wachapishaji. Jambo la ajabu ni kwamba mwanamke huyu aliendelea kuwa na imani katika wazo lake, hakukata tamaa.

**“Hakuna mambo makuu pasipo
uwekezaji katika muda”**

Miaka mingi baadaye nakala milioni 500 za kitabu “Harry Potter” ziliuzwa ulimwenguni kote na kumfanya Rowling kuwa mwandishi wa kwanza bilionea ulimwenguni. Jaribu kutafakari.

Unahitaji muda zaidi ili uwe miongoni mwa watu wanaofanya mambo yasiyo ya kawaida katika ulimwengu huu. Usiwe na haraka maisha si tukio, maisha ni mchakato.

Ufunguo #8: Nidhamu Zaidi

Siku moja Brian Tracy mwandishi wa kitabu kiitwacho “No Excuses! The Power Of Self Discipline” (Hakuna Visingizio Nguvu Ya Nidhamu Binafsi), alimuuliza Kop Kopmeyer mwandishi wa kanuni 1000 za mafanikio, katika kanuni zote 1000, ipi ni kanuni muhimu zaidi?

Kopmeyer alitabasamu na kumjibu kwamba kanuni muhimu zaidi ni **nidhamu**. Kulingana na Elbert Hubbard, Nidhamu “ni uwezo wa kufanya jambo unalopaswa kulifanya, kwa wakati sahihi, ukiwa unapenda au hupendi.”

“Watu wakuu ni watu ambao maisha yao wameyajenga chini ya msingi wa nidhamu”

Kama tunataka kuwa miongoni mwa watu wanaofanya mambo makuu, hatuna budi kuwa na urafiki na nidhamu. Mambo yasiyo ya kawaida mara zote hufanywa na watu wenye nidhamu. Jaribu kufuatilia.

Wakati Wako Wa Kwenda Zaidi Ya Kawaida

Albert Einstein aliwahi kusema, “Unapaswa kujifunza kanuni za mchezo. Na baada ya kujifunza ucheze vizuri kuliko mtu mwingine yeyote.” Ni wakati wako wa kucheza vizuri zaidi.

Umejifunza kanuni 8 ambazo watu wengi ambao hufanya mambo yasiyo ya kawaida huzitumia. Hii ni kusema kwamba kama na wewe utachagua kuziishi kanuni hizi ni dhahiri kwamba utakuwa miongoni mwa wafanya mambo yasiyo ya kawaida katika ulimwengu huu. JIAMINI.

Kumbuka, ulimwengu utakuwa na mwonekano bora zaidi kama wewe utachagua kuuishi uwezo wako halisi.

Mungu akujalie neema zaidi

Kwa Uwezo Wako Huo

“BWANA akamtazama, akasema, Nenda kwa uwezo wako huu, ukawaokoe Israeli na mkono wa Wamidiani.

Je! Si mimi ninayekutuma?”

-Waamuzi 6:14

Inawezekana kuuishi uwezo wako halisi, inawezekana kutumia zaidi ya 10% ya uwezo wa ubongo wako, inawezekana wewe kuwa sababu ya mambo yasiyo ya kawaida kufanyika katika ulimwengu wako.

Huhitaji kuwa maarufu sana, huhitaji kuwa tajiri, huhitaji kuwa na cheo, n.k. Unahitaji tu kuanza kuutumia uwezo ulio nao.

Kielelzo Cha Gideoni

Mungu alipokutana na Gideoni mtu aliyejizania kuwa yeye ni mtu wa kawaida tena asiyefaa. Mungu hakutafuta kupambana na mtazamo wake, bali alimtaka aende kwa uwezo aliokuwa nao.

Waamuzi 6:14 “BWANA akamtazama, akasema, Nenda kwa uwezo wako huu, ukawaokoe Israeli na mkono wa Wamidiani. Je! Si mimi ninayekutuma?”

Katika kisa hiki tunaweza kujifunza mambo kadhaa ambayo yatakusaidia kuufikia uwezo wako halisi uliombiwa na Mungu tangu awali.

Jambo #1: Amini Katika Uwezo Ulionao

Malaika wa Bwana anamwambia Gideoni **“BWANA yuko pamoja nawe, Ee shujaa.”** Hii si kauli ya kawaida, hii ilikuwa ni kauli iliyomtaka Gideoni aamini juu ya uwezo aliokuwa nao.

Kama ilivyokuwa kwa Gideoni, Mungu anakutaka uamini katika uwezo ulionao. Ukisoma kisa hicho huoni Mungu akiahidi kumwongezea nguvu Gideoni ili awe shujaa, HAPANA. Mungu alimtaka aende na uwezo uleule aliokuwa nao.

**“Uwezo wako ni mkubwa mno,
unahitaji tu kujiamini”**

Jambo #2: Anza Na Uwezo Ulio nao

Kuamini uwezo wako ni jambo la kwanza, baada ya kuuamini unapaswa kuanza nao. Mungu anaposema **“nenda kwa uwezo wako huu”**, inawezekana katika macho ya Gideoni ulikuwa ni uwezo mdogo lakini Mungu alimtaka aanze na huo.

Unaweza kujihisi kama huna uwezo mkubwa, ni sawa kabisa, lakini hupaswi kusubiri kuwa na uwezo mkubwa, uwezo wako mkubwa umefichwa katika uwezo huo mdogo ulionao. Anza kuutumia huo na kadiri utakavyoendelea utajua jinsi ulivyo na uwezo mkubwa.

“Unahitaji kuanza kuutumia uwezo mdogo ulionao ili ufikie uwezo wako halisi”

Jambo #3: Anzia Hapohapo Ulipo

Huhitaji kutoka hapo ulipo ili uudhihirishe uwezo ulionao, unahitaji kuanzia hapohapo ulipo. Ushujaa wa Gideoni ulianza nyumbani kwa baba yake (alipokuwa anaishi), **Waamuzi 6:27-32.**

Hata Yesu aliwambia wanafunzi wake, baada ya kupokea nguvu za Roho Mtakatifu watakuwa mashahidi wake kuanzia Yerusalemu (walipokuwa wanaishi), na ushawishi wao ungeendelea ulimwenguni kote **(Matendo 1:8).**

Anzia hapohapo ulipo, fanya mambo ambayo moyo wako unakusukuma kuyafanya katika mazingira yako. Kuanzia hapo ulipo Mungu atakufikisha katika miisho ya ulimwengu.

Jambo #4: Anza na hali hiyohiyo uliyo nayo

Huhitaji kuwa na chochote kuanza kuuishi uwezo wako halisi, unahitaji tu kuwa wewe halisi. Gideoni hakuhitaji silaha za mamilioni ya pesa ili awe shujaa, alihitaji tu kuwa na mtazamo sahihi kuhusu yeye.

Hivyo hivyo ulivyo na maarifa uliyojifunza kupitia kitabu hiki anza kuuishi uwezo wako, usisubiri uwe na hali nzuri ya kimaisha ili uanze, utachelewa. Kumbuka;

“Uwezo ulioubeba ni mkubwa kuliko hali yako, hali yako itakuwa bora kama tu utaanza kuuishi uwezo wako”

Jambo #5: Anza Na Rasirimali Ulizonazo

Gideoni alipojua kuwa yeye ni shujaa alianza kutumia rasilimali zilizokuwa zinamzunguka (za kawaida) kuuthibitisha ushujaa wake.

Kwa mfano, Gideoni alianza na watu 10 tu kama watu waliomfuata katika harakati zake **(Waamuzi 6:27-32)**. Na baadaye maelfu ya mashujaa walimfuata.

“Huhitaji kuwa na kila kitu kufanya makuu, unapaswa kuanza kuvitumia vile ulivyonavyo”

Watu wote waliofanya mambo makubwa na ya kuushangaza ulimwengu, hawakuanza na kila kitu bali walianza na vile walivyokuwa navyo. Hata wewe huhitaji kuwa na kila kitu ili uanze unatakiwa kuanza na vile ulivyo navyo.

Amani iwe pamoja nawe; usiogope...

Mwisho wa yote Biblia inasema;

Waamuzi 6:23 “BWANA akamwambia [Gideoni] “Amani iwe pamoja nawe; usiogope; hutakufa”.

Mpaka kufikia hapa sina la ziada nimekuombea amani ya Bwana iende pamoja nawe, naam, usiogope kwa kuwa Bwana atakuwa pamoja nawe kukusaidia kuuishi uwezo wako halisi kwa utukufu wake.

UBARIKIWE

HITIMISHO

“Kuirejelea Sura Yako Halisi”

Mwanadamu alianza kuwa wa kawaida pale alipomwasi Mungu kwa kumtenda dhambi. Dhambi ilimfanya mwanadamu apoteze kumfanania Mungu, naam, kwa dhambi mwanadamu akaanza kuishi chini ya uwezo wake halisi.

Ili uweze kuufikia uwezo wako halisi lazima kwanza umrudie Mungu aliye chanzo cha uwezo wako, vinginevyo utaendelea kuwa mtu wa kawaida.

Hii ni fursa maalumu kwa ajili yako, fursa ya kuurudia uhalisia wako. Kama unajua kuna ubaya (dhambi) ambao umekuwa ukikuweka mbali na Mungu, ni wakati wako wa kutubu na kumrudia Mungu (kuokoka) ili uwe salama.

Kama upo tayari sasa kuokoka, Sali sala ifuatayo;

Baba katika jina la Yesu ninakuja kwako, nimetambua kuwa nimekuwa mbali nawe kwa sababu ya dhambi yangu. Leo ninarudi kwako kwa kutubu, ninaomba unisamehe, unipokee na unifanye kuwa mwanao. Zaidi ninaomba

**unisaidie kuufikia uwezo wangu wote kwa
utukufu wa jina lako.**

AMINA

Kama umesali sala hii SASA UMEOKOKA, wewe ni sura na mfano halisi wa Mungu.

Kwa maelekezo zaidi juu ya namna unavyoweza kuukulia wokovu, tafadhali wasiliana nami kwa mawasiliano yanayopatikana katika kitabu hiki.

MUNGU AKUBARIKI

MAREJEO

Carnegie, C. (1937). *How to win friends and influence people*. Cornerstone Publishing.

Longhorn. (2011). *Kamusi ya karne ya 21*. Dar es salaam, Tanzania: Longhorn publishers (T) Ltd.

Mason, J. (2004). *Imitation is limitation*. USA. Orient Paperbacks.

Merriam-Webster's collegiate dictionary (10th ed.). (1993). Springfield, MA: Merriam-webster.

Tracy, B. (2010). *No excuses! the power of self Discipline*. New York: Vanguard Prss.

Vitabu Vingine

Vitabu vingine vilivyoandikwa na Adriano Mkonda ni pamoja na;

1. Nguvu Ya Wazo
2. Kuwa Baraka Kwa Wengine
3. Kusudi 101
4. Maono 101
5. Malengo 101
6. Mafanikio Halisi
7. Sayansi Ya Muda
8. Kijana Na Ujana
9. Sayansi Ya Kipaji
10. Nidhamu Binafsi
11. Nguvu Ya Kuanza
12. Uwekezaji Wenye Matokeo
13. Ulimwengu Wa Mitandao
14. Utoaji Unaomgusa Mungu

Kwa Mawasiliano Na Kujifunza Zaidi

Ikiwa umeguswa na ujumbe wa kitabu hiki, una swali, una maoni, ushauri, ushuhuda au unahitaji vitabu vingine, unaweza kuwasiliana moja kwa moja na mwandishi;

ADRIANO MKONDA

Simu/meseji/WhatsApp: +255 656 189 370, +255 621 618 821
Barua pepe: mkondaadriano10@gmail.com

Pia unaweza kupata mafundisho zaidi kutoka kwa Adriano
Mkonda kupitia;

DIVINE TRANSFORMATION GLOBAL (DITRA Global)

Barua pepe: ditraglobaltz@gmail.com

Facebook: Ditra Global Tanzania

Instagram: ditra_global

WhatsApp: +255 656 189 370

WhatsApp link:

<https://wa.me/message/WSSND7DQIGVC01>



Adriano Mkonda ni Mtanzania, mwalimu kitaaluma, mwalimu wa neno la Mungu, mwandishi wa vitabu na muasisi wa DIVINE TRANSFORMATION GLOBAL (DITRA Global).

Shauku yake kuu ni kuwaleta watu katika ukamilifu wa Kristo kwa kuwekeza kweli ya Mungu ndani yao ili wawe sababu ya ustawi wa jamii zao na ulimwengu kwa ujumla.

Hadi sasa Adriano amefanikiwa kuandika vitabu zaidi ya 15 pamoja na kufundisha makundi mbalimbali ya watu makanisani, mashuleni, vyuoni na katika mitandao ya kijamii.

Kupitia vitabu vyake na mafundisho yake watu wengi wanafikiwa na kweli ya Mungu, wanabadilishwa na kuinuliwa kila iitwapo leo.

Kwa mawasiliano na kujifunza zaidi

+255 656 189 370

ditraglobaltz@gmail.com



ditraglobal



Ditra Global Tanzania